

**REGIONAL NEWS BULLETIN
HEADLINES (EVENING)**

Date – 09/11/2024

Time - 18:30 Hrs

1. Adviser to Chief Minister Pu TBC Lalvenchhunga'n Open Market Borrowings atanga thla tin sum sawrkar in a puk chu budget ah dah sa a ni a ti.
2. Zirna sang zawk hawng tura thawdunna National Institute of Technology (NIT), Mizoram leh Indian Institute of Management, Visakhapatnam MOU an ziak.
3. Vice President Jagdeep Dhankar chuan zirna chu sumdawnna ni loin khawtlang rawngbawlna a ni a ti.
4. Maharastra inthlan campaign neih mekah Prime Minister Narendra Modia chuan a sawrkar term thumna chuan hmasawna project cheng vaibelchhe tam tak man a hawng leh tawh a ti.

<><><>

ADVISER TO CM

Adviser to Chief Minister Pu TBC Lalvenchhunga'n Open Market Borrowings atanga thla tin sum sawrkar in a puk chu budget ah dah sa thlap a ni a ti.

Akashvani corr nen an inkawmna ah he thu hi sawiin Pu TBC Lalvenchhunga chuan kumin chhunga leiba telloa sum hmuh tawh tawh chu cheng Vbc 4093.67 a ni a ti a, Budget Estimate atanga zaa 33 hmuh tawh a ni tih sawiin nikum tun ang hunah zaa 27.97 hmuh a ni a ti a, kuminah Chhiah atanga sawrkar sum hmuh chu cheng Vbc 2834.08 niin beisei zat atanga zaa 38.24 hmuh tawh a ni a. Nikumah tun ang hunah khan beisei zat zaa 36.51 hmuh a ni tih a sawi.

Pu TBC Lalvenchhunga chuan sawrkar kum kal meka sum puk tawh zat chu cheng Vbc 1058 a ni a ti a, Sum puk chu nikum aia a tlem zawkna cheng Vbc 800 chuang zet a ni tih sawiin Kuminah April atanga September thlengin sum lu atanga a pung tling khawm sawrkar rulh tawh zat chu cheng Vbc 198.29 a tling hman a ti bawk.

Adviser to CM chuan sawrkarin pawisa a puk chu Mamawh thar thut vanga puk ni lo in sum hmuh a hnar in a daih loh hmasawna ruhrel dinna tur leh leiba sum lu rulhna tur atana puk tura ruahman a ni a ti a, Kumin chhungin leiba sum lu cheng Vbc 460 leh a pung cheng Vbc 604 rulhna tur budget pass vek a ni a ti bawk.

<><><>

BRAHMA KUMARIS

Ruihhlo leh a kaihnawih awm lohna rama India siam tura hmalakna'Nasha Mukh Bharat Abhiyaan' Mizorama kalpui tura hma la tu tur Bhahma Kumari Dr Swapan Gupta chuan Mizorama ruihhlo do an kalpui mek chu a hlawhtlin theih a beisei a ti a, a do danah rilru put hmang thlak a, mihring rilru her rem chuan hmasawna a thlen a beisei tih a sawi.

Akashvani corr nen an inkawmna ah sawiin Dr Swapan Gupta chuan State danga hma anlo lak tawhah a hlawhtlinna an hmu tawh thin tih sawiin Mizoram chu nasa taka beihpui thlak ngai a ni a ti a, thalaite duhzawng leh an rilru puthmang thlak a pawimawh tih sawiin mi tin te tanrual a ngai tih a sawi bawk.

An hmalakna ah rinna leh ngaihtuahna sawrbingna lam thupua neia hma la thin an ni tih sawiin nundan hrisel chawilara ataka an nunpui thin an ni a ti a, Mizoram mipuite chu ruihhlo do hmalakna kawnga hmanraw hrang hrangte tangkai zawka hman thiam tum turin a chah a. Ruihhlo do kawnga hmalatu zawng zawngte pawh tha thlah lova phur taka theihtawp chhuaha tanrual puiah a sawm a ni.

Dr Swapan Gupta sawi danin ruihhlo do ringawt lo in kawng dan zawn a ngai a ti a, ruihhlo tih duhna thinlung an putna thin beidawnna, harsatna an tawh hriatpui an pawimawh tih sawiin mi tin ten himna an zawn dan kawng a inang lo a, ruihhloa himna an zawn loh nan khawtlangah theihtawp chhuah a ngai tih a sawi. Dr Swapan Gupta hi GB Pant Institute of PGMER, Professor of Neurology a ni bawk a ni.

Chhiahtlang Kawn Veng Welfare leh All NGOs huaihawtin Ruihhlo Do Beihpui Chhiahtlang Bazar kawtah tukin khan neih tan a ni a, mipui kal khawm ten veng chhunga zu leh ruihhlo zawrh an duh lohza an lantir a ni. He hun hi Kawn Veng Welfare Committee (KWC) Chairman Pu R. Lalremchhungan a kaihuaia, mipui kalkhawm ten ruihhlo dona lam thuziak keng chungin an au rual a; Khawtlang

tihnawktu zu leh ruihhlo zuar thinten sim a zuar tawh lo tura an duh thu te; Zu leh ruihhlo an do zel dawn thu te, khawtlang ngenna zahlo chuan veng chhung chhuahsan tura an duh thu te, ram leh hnam hmelma zu leh ruihhlo zuar an mamawh loh thute leh Sawrkar phalloh zuartute chu na taka hrem an phut thu te in an au rual a ni.

<><><>

SVEEP

Saitual District-ah, District Election Officer leh SVEEP Nodal Officer te buatsaihin VC House, Maite khua, voters awareness free health camp neih a ni a.

He hunah hian inentir tura kalkhawmte chu special summary revision 2025 chhunga electoral roll-a inziahlul theih a ni tih leh EPIC tihdanglam ngaite tan mahni BLO te hnenah dilna a thehluh theih tih hriattir an ni a, Electoral roll chungchanga hriattur pawimawh tak tak te inhrilhriatna hun hman a ni bawk.

<><><>

NIT MIZORAM

National Institute of Technology (NIT), Mizoram leh Indian Institute of Management, Visakhapatnam chuan ningani khan thawh dunna thuthlung, Memorandum of Understanding an ziaik.

NIT- Mizoram leh IIM-Vishakapatnam thawh dunna hnuai hian kum li zir Bachelor of Technology (B.Tech) leh Master of Business Administration (MBA) kalpui a ni dawn a; NIT-Mizorama B.Tech zirlaite chuan kum 5 chhungin an zirlai pangngai bakah, B.Tech kum thumna (3rd year) atanga MBA zir telin, HIM-Visakhapatnam atangin MBA degree an nei thei dawn a ni.

MoU hi ningani khan ziah a ni a, MoU ziah hnuah hian NIT-Mizoram leh IIM-Vishakapatnam hotute chuan Governor leh Chief Minister an hmu a, MoU chungchang leh hmalaknate an hrilh a ni.

<><><>

MSU PREZ

Anti Corruption Bureau (ACB) leh Aizawl Police Station-a duty-te chuan nimin khan Mizoram Students Union president Samuel Zoramthanpuia an man a; nimin vek khan court-ah hruai niin, court thu angin Central Jail-ah dah luh a ni.

Thudawn danin, ACB chuan Samuel Zoramthanpuia hi sum tihchingpen thubuaiah an man a, chumi hnuah Aizawl Police Station-a duty-ten mi hrên leh, vauna hmanga mi pawisa chhuhsak thubuaiah an man ve leh bawk.

Samuel Zoramthanpuia hi nimin khan Aizawl District Court-ah hruai nghal a ni a; court thu angin Central Jail-ah dah luh a ni. Thubuai an ziah luhna dan tlawhchhante chu bail theih loh a nih thu, thu dawnna chuan a sawi.

Thu dawn danin, ACB-in MSU President an man chhan hi - kum 2022-a 'Project Mizoram (Covid-19 Relief Fund)' hminga MSU Gen.Hqrs - in Health and Family Welfare department kaltlanga cheng nuai 50 an dawn hman anih dan leh Myanmar ralhlante hriselna kawnga buaipui thintu pawl Chin Health Organisation kaltlanga MSU-in damdawi leh medical equipment chi hrang hrang leina tur sum an hmuh cheng nuai 15 sing 1 sang 3 za sawmruk pahnih hman danah thil fel hlel a awm tih hmuhchhuah a ni a,

ACB chuan complaint dawngin sorkar chuan kumin September 9 khan preliminary enquiry tih phalna ACB a pe a, ACB preliminary enquiry report-in a chungga tarlan thilah hian thil felhleh a awm tih a finfiah anih avangin regular case siam phalna ACB-in sorkarah a dil leh a; sorkar phalna angin ACB Police Station-ah kumin October 17 khan thubuai ziah luh a ni.

Aizawl Police Station-in an man chhanah hian hnam dang company-a thawk MSU pisaah hrengin vauna hmanga pawisa chhuhsak thubuaiah a ni a, He thil thlen lai hian Samuel Zoramthanpuia hi MSU President a ni tawh a ni.

<><><>

AIR NEWS ON SOCIALMEWDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

VICE PRESIDENT

Vice President Jagdeep Dhankar chuan zirna chu sumdawnna ni loin khawtlang rawngbawl a ni a ti.Vawiina National Institute of Technology New Dlehi Convocation vawi 4-naah he thu hi sawiin Vice President Dhankar-a chuan zirbingna leh ngaihtuahna hman nasat a tul thu a sawi a. Ram changkang dinhmun thleng turin heng hi a pawimawh hle a ni a ti bawk. Pu Dhankar-a chuan zirbingna leh ngaihtuahna

thar hman thiam lama ram dinhmun chuan a khawvel ram thiltitheh tehnaah pawh dinhmun sangah a dah dawn a ti a. Zirna in te chu hemi lam kawnga an theihna ti pung zel turin a chah a. Sumdawng liante leh pawlte pawh sum tam zawk thehchhuak turin a ngen a ni.

<><><>

BALUCHISTAN EXPLOSION

Balochistan-ra Quetta Railway Station-a thilpuakah mi 24 aia tlem lo an thi a, mi 40 chuangin hliam an tuar. Thudawn danin Peshawar pan tur rel a tlan chhuah dawn lai takin vanduinah hi a thleng a. He rel puak hi Quetta atanga Peshawar pan tur niin Police te chuan an sawi a. Chhanchhuah hna hi ngawrh takin thawh nghal a ni a. Kar hmasa lawk khan Pakistan khawthlang lama hmeichhe sikulah bomb alo puak tawh bawk a ni.

<><><>

PM

Maharastra inthlan campaign neih mekah Prime Minister Narendra Modia chuan a sawrkar term thumna chuan hmasawna project cheng vaibelchhe tam tak man a hawng leh tawh a ti. Vawiina Vidharba-ah he thu hi sawiin Pu Modia chuan heng hmasawna project tam tak zingah hian Maharastra ami tur pawh a tel a ti a. Sawrkar laipui chuan industry leh hmasawna ruhrel tihchangtlun kawngah la chingtute tan theihtawpin hma a la a ti a. Amravati ah textile park lian tak hawn a ni a ti bawk.

<><><>